

## Ғазаб ақлнинг кишанидир



15:09 / 03.10.2020 4160

Шайтоннинг қалбга кириш йўллари банданинг сифатлари бўлиб, улар кўпчиликти ташкил қилади. Биз мазкур эшикларнинг энг катталари ҳақида сўз юритамиз.

### *1. Ғазаб ва шаҳват.*

Ғазаб ақлнинг кишанидир. Ақлнинг аскари заиф бўлса, шайтоннинг аскари кучли бўлади. Инсон қанча кўп ғазабланса, шайтон уни худди ёш бола тўпни ўйнагандек қилиб ўйнашга ўтади.

### *2. Ҳасад ва ҳирс.*

Банданинг бирор нарсага ҳирс қўйиши қанчалик кучли бўлса, ўша ҳирси уни шунчалик кўр ва кар қилади.

Зотан, Набий соллаллоҳу алайҳи васаллам:

**«Нарсага бўлган муҳаббатинг кўр ва кар қилур»**, деганлар.

*Термизий ва Абу Довуд ривоят қилишган.*

Шайтоннинг кириш жойлари қалб кўзларининг нури ила кўрилади. Агар ўша кўзларни ҳирс ва ҳасад беркитиб қолса, кўриб бўлмай қолади. Ана

ўшанда шайтон фурсатни ғанимат билиб, ҳасадчи ва хирсли одамга шаҳватга эриштирадиган ҳар бир нарсани чирой-ли кўрсатиш пайдан бўлади.

### *3. Таомдан ортиқча тўйиш.*

Бунда таом ҳалол, пок бўлиши ҳам мумкин. Чунки таом шаҳватни кучайтиради. Шаҳватлар эса шайтоннинг қуролларидир. Кўп ейишда олти ёмон хислат борлиги таъкидланади.

1. Қалбдан Аллоҳнинг хавфи кетиши.
2. Қалбдан халойиққа нисбатан раҳмнинг кетиши. Чунки у ҳаммани тўқ деб ўйлайди.
3. Тоатни оғир кўриб қолиш.
4. Ҳикматли сўзни эшитганда, таъсирланмаслик.
5. Мавъиза ва ҳикматли сўзларни гапирса, одамларга таъсир қилмаслиги.
6. Турли хасталикларнинг келиб чиқиши.

### *4. Кийим-кечак, асбоб-анжом ва уй-жойда зебу зийнатга ружу қўйиш.*

Қачон шайтон инсон қалбида мазкур ҳолларнинг урчиганини кўрса, дарҳол тухум қўйиб, болалайди. Мазкур одамни уй-жойини зийнатлашга чақиради: «Шифтни яхшила, деворларни чиройли қил, хоналарни кенгайтир», дейди.

Шунингдек, «Кийимларингни қойилмақом қил, уловнинг ҳеч кимда йўғини топ», дейди. Қарабсизки, умрини шундай ишлар билан ўтказиб турибди. Бу ҳол давом этаверса, оқибатда банда куфрга бориши ҳам мумкин.

### *5. Одамлардан тамагир бўлиш.*

Чунки қалбга тамагирлик ёлиб бўлса, шайтон унга тинимсиз равишда кимдан тама қилаётган бўлса, ўшанинг олдида турли риё ва ҳийла-найранглар билан жилваланишни чиройли кўрсатади.

Энг камида у ўзи тамагирлик қилаётган одамни ўринсиз мақташга ўтади. Унинг розилигини топиш учун ҳар қандай гуноҳни қилишга тайёр бўлади.

### *6. Шошқалоқлик ва ишларда аниқликни тарк қилиш.*

*Анас ибн Молик розияллоҳу анҳудан ривоят қилинади:*

**«Набий соллаллоҳу алайҳи васаллам: «Шошмаслик Аллоҳдандир ва шошқалоқлик шайтондандир», дедилар».**

*Байҳақий ривоят қилган.*

Аллоҳ таоло Анбиё сурасида марҳамат қилади:

عَجَلٍ مِنَ الْإِنْسَانِ خُلِقَ<sup>ع</sup>

**«Инсон шошқалоқ ўлароқ яратилгандир» (37-оят).**

Аллоҳ таоло Исро сурасида марҳамат қилади:

عَجُولًا الْإِنْسَانُ وَكَانَ<sup>ح</sup>

**«Инсон шошқалоқ бўлгандир» (11-оят).**

Аллоҳ таоло Тоҳа сурасида марҳамат қилади:

وَحِيَّهُ إِلَيْكَ يُقْضَىٰ أَنْ قَبْلِ مِنَ الْقُرْآنِ تَعَجَّلْ وَلَا<sup>ط</sup>

**«Сенга ваҳийси битмасидан, Қуръонга ошиқма» (114-оят).**

Чунки ҳар қандай ишга уни яхшилаб ўрганиб, билгандан кейингина киришиш лозим. Яхшилаб ўрганиш эса тааммулга ва муҳлатга муҳтождир.

Бу нарса шошқалоқлик билан бўлмайди. Шошқалоқлик инсонни пала-  
партиш иш қилишга мажбур этади.

*“Рухий тарбия” китобидан*